

REGVLA VIRGINVM.

Auch Cecis genandt.

Diese Regel folget billich auff die Regulam Alligations, denn sie fleusst vnd entspringet aus derselbigen/ vndt seind einander so verwand vnd ehnlich / das offters eine durch die ander verrichtet wird/wie in folgenden Exempeln zu sehen ist.

Iohan. 2. wird gedacht der Hochzeit zu Cana in Galilea / da Christus vnser Heyland Wasser zu Weine gemache/ Braut vndt Brutigam mit einem herzlichem Geschenke verehret/ vndt damit bezeuget hat / das er des heyligen Ehestandes Stifter vndt erhalter sey/ an ehrlichen Hochzeiten wolgefallen habe/ vndt fromme Gottfurchtige Eheleute mit Gnad vndt Segen Krone. Darumb auch Gottliebende Leute den Heyligen Ehestand als Gottes Ordnung heylig halten/die lieben Eheleute mit trost/ rath vndt hülffe trewlich befördern / vndt sonderlich gegen den Armen vndt Dürfftigen / ihre milde Herzk vndt Hand auffthun sollen.

Dauon wollen wir ein solch Exempel nemen.

Wann auff einer Hochzeit von Mannen vndt Frawen/ Gesellen vndt Jungfrawen 250. Personen versamlet weren / vndt in ihrer Ehrs vndt Freudenreichen versammlung von einem armen vndt frommen Studenten vmb eine Christliche Beystewr ersuche würden / ihn zu seinem Studiren zu befördern / auch die Hochzeit Geste durch solche bitte bewogen / eine freywillige beystewr zusammen legeten :

Ein Mann 9. Sestert.

Eine Fraw 5. Sestert.

Ein Geselle 3. Sestert.

Eine Jungf. 2. Sestert.

In der Summa 34. Kronen/ vndt 7½. Römische Denar.